

# 大乘伽耶山頂經

菩提留志譯



## 南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

## 大乘伽耶山頂經

如是我聞：一時，婆伽婆住伽耶城山頂精舍。

與大比丘眾一千人俱。其先，悉是長髮梵志，皆阿羅漢，諸漏已盡、所作已辦，捨諸重擔、逮得己利，盡諸有結、正知解脫，心得自在、到於彼岸。

復與無量諸菩薩摩訶薩眾俱。

爾時，世尊得成正覺，其日未久，寂然宴坐，入於三昧，觀察法界。

作是念言：我已證菩提、已得聖智慧、已辦所應作、已捨諸重擔、已出生死曠野、已捨離無明、獲於智明、已拔毒箭、已盡渴愛、已證法界、已擊法鼓、已吹法螺、已建法幢、已捨離生死眼、說於法眼、已閉惡道、開眾善道、已捨非田、示諸福田。

我今審觀如是之法，誰能現證、已證、當證？為身證耶？為心證乎？

若身證者，身是頑鈍、無覺無思，猶如草木、牆壁瓦石，從於四大、父母所生，無常、敗壞散滅之法，必假塗洗衣食等緣而得存立。

若心證者，心如幻化，無相、無形，無所依處、無所容受。

又，菩提者，隨於世間，而立名字。無音響、無形色，無成實、無相狀，無來、無去，不出、不入。過於三界，無有處所，不可見聞、不可憶念。離攀緣

處，非戲論境，無所入、無文字，不可動搖、不可安立，絕於一切語言之道，而言現證、已證、當證，但唯名字，虛妄分別，無生、無起、無有體性，不可取、不可說、不可愛著。是中，實無已成正覺、現成正覺，及當成者。若能如是無證、無成，乃得名為成正覺耳。何以故？菩提者，離於一切變動相故。

爾時，文殊師利菩薩摩訶薩知佛所念，而作是言：世尊！若菩提如是相者，諸善男子善女人發菩提心，應云何住？

佛言：文殊師利！如菩提相，應如是住。

文殊師利菩薩言：世尊！何者是菩提相？

佛言：文殊師利！菩提相者，獨超三界，雖隨世俗而有名字，遠離一切音聲言說。諸菩薩眾發趣菩提，從初發心，則無所趣。

是故，文殊師利！諸善男子善女人，應以遠離發趣之心，而住菩提。

文殊師利！若諸菩薩能發趣於無所趣者，是則趣向菩提之道。

文殊師利！趣於無自性，是趣向菩提。趣於無處所，是趣向菩提。趣於法界性，是趣向菩提。趣於一切法中無所執著，是趣向菩提。趣於實際無差別，是趣向菩提。趣於如鏡中像、如光中影、如水中月、如熱時焰，是趣向菩提。

爾時，眾中有天子名淨月威光，白文殊師利菩薩言：大士！諸菩薩摩訶薩修習何行？依何處修？

文殊師利菩薩言：天子！諸菩薩摩訶薩修大悲行，依於一切眾生處修。

淨月天子又問言：菩薩大悲，依何心起？

文殊師利菩薩言：菩薩大悲，依無諂誑心起。

又問言：無諂誑心，依何而起？

答言：無諂誑心，依於一切眾生平等心起。

又問：於一切眾生平等心，依何而起？

答言：依於入非一非異法性心起。

又問：入非一非異法性心，依何而起？

答言：依深信心起。

又問：深信心，依何而起？

答言：依菩提心起。

又問：菩提心，依何而起？

答言：依六波羅蜜起。

又問：六波羅蜜，依何而起？

答言：依方便慧起。

又問：方便慧，依何而起？

答言：依不放逸起。

又問：不放逸，依何而起？

答言：依三種淨行起。

又問：三種淨行，依何而起？

答言：依十善業道起。

又問：十善業道，依何而起？

答言：依持淨戒起。

又問：持淨戒，依何而起？

答言：依如理思惟起。

又問：如理思惟，依何而起？

答言：依觀察心起。

又問：觀察心，依何而起？

答言：從憶持不忘起。

爾時，淨月威光天子復問文殊師利菩薩言：大士！諸菩薩發菩提心，凡有幾種，於因於果而得成就？

文殊師利菩薩言：天子！諸菩薩發菩提心，凡有四種，於因於果而得成就。

何等為四？①初發心，②解行住發心，③不退轉發心，④一生補處發心。

應知：初發心，為解行住因。解行住發心，為不退轉因。不退轉發心，為一生補處因。一生補處發心，為一切智因。

復次，天子！應知：初發心，如田中下種。解行住發心，如芽漸增長。不退轉發心，如枝葉花果次第出生。一生補處發心，如果實成熟。

復次，天子！第一發心，如造車人，先集於材。第二發心，如得材已，各別治淨。第三發心，如彼匠人，造車成就。第四發心，如以其車，引重致遠。

復次，天子！第一發心，猶如初月。第二發心，如五日夜至七夜月。第三發心，如十日夜月。第四發心，如十四日夜月。應知：如來所有智慧，譬如明月至十五夜，一切光色悉皆圓滿。

復次，天子！第一發心，超聲聞地。第二發心，超辟支佛地。第三發心，超

不定地。第四發心，住決定地。

復次，天子！第一發心，譬如有人，初學字母。第二發心，如彼學人，漸解分析。第三發心，如學已久，善知算數。第四發心，如學成熟，了達諸論。

復次，天子！第一發心，菩薩住因。第二發心，菩薩住智。第三發心，菩薩住斷。第四發心，菩薩住果。

復次，天子！第一發心，因所攝。第二發心，智所攝。第三發心，斷所攝。第四發心，果所攝。

復次，天子！第一發心，從因而起。第二發心，從智而起。第三發心，從斷而起。第四發心，從果而起。

復次，天子！第一發心，因差別分。第二發心，智差別分。第三發心，斷差

別分。第四發心，果差別分。

復次，天子！第一發心，如採集眾藥。第二發心，如分辨藥性。第三發心，如隨病合藥。第四發心，如服藥除愈。

復次，天子！第一發心，生法王家。第二發心，學法王法。第三發心，學得解了。第四發心，學得自在。

爾時，會中，有天子名決定光明，白文殊師利菩薩言：大士！何者是菩薩摩訶薩速疾道，諸菩薩摩訶薩行此道，疾得阿耨多羅三藐三菩提？

文殊師利菩薩言：天子！菩薩摩訶薩速疾道有二種，諸菩薩摩訶薩行此道，疾得阿耨多羅三藐三菩提。

云何為二？①方便道，②般若道。

方便道者，攝諸善法。般若道者，了知簡擇。

方便道者，不捨眾生。般若道者，能捨諸法。

方便道者，知法和合。般若道者，知不和合。

方便道者，能為因緣。般若道者，能至寂滅。

方便道者，能知諸法差別之相。般若道者，能知法界無差別理。

方便道者，能具莊嚴諸佛國土。般若道者，能知諸佛國土平等。

方便道者，能知眾生根行不同。般若道者，能知根行空無所有。

方便道者，令諸菩薩詣於道場。般若道者，能令菩薩逮無所覺。

天子！菩薩摩訶薩復有二種速疾道。

云何為二？①資糧道，②決擇道。

資糧道者，謂施等五波羅蜜。決擇道者，謂般若波羅蜜。

有著道、無著道，有漏道、無漏道，皆如是說。

復有二種速疾道。

云何為二？①有量道，②無量道。

有量道者，謂有相位。無量道者，是無相位。

復有二種速疾道，所謂：智道及以斷道。

智道者，謂從初地至第七地。斷道者，從於八地至第十地。

爾時，會中，有菩薩名勇修智信，白文殊師利菩薩言：大士！云何為菩薩摩訶薩所知義？云何為菩薩摩訶薩所修智？

文殊師利菩薩言：善男子！義非和合，智是和合。

勇修智信菩薩言：大士！以何因故，義非和合，智是和合？

文殊師利菩薩言：善男子！義是無為，無為則非義。非義中，無有法若和合若不和合。義是無變異、無成實，不可取、不可捨，皆如是說。

善男子！智名為道，道與心和合，非不和合。

復次，善男子！智唯是和合，非不和合。

勇修智信菩薩言：大士！何因緣故，智唯是和合，非不和合？

文殊師利菩薩言：善男子！智，善能觀察蘊處界、善觀察緣起法、善觀察處非處。以是故，唯和合，非不和合。

復次，善男子！菩薩摩訶薩，有十種智。何等為十？①因智，②果智，③義智，④方便智，⑤般若智，⑥攝智，⑦波羅蜜智，⑧大悲智，⑨教化眾生智，

⑩於一切法無所著智。

善男子！如是，名為菩薩摩訶薩十種智。

復次，善男子！菩薩摩訶薩，有十種發起。何等為十？

①身發起，為一切眾生淨治身業故。

②口發起，為一切眾生淨治口業故。

③心發起，為一切眾生淨治意業故。

④內發起，於一切眾生無所取著故。

⑤外發起，於一切眾生行平等行故。

⑥智發起，修習一切佛智故。

⑦國土發起，示現一切佛剎功德莊嚴故。

⑧教化眾生發起，知諸煩惱病藥故。

⑨真實發起，能成就決定聚故。

⑩無為智滿足發起，於一切三界心無所著故。

善男子！如是，名為菩薩摩訶薩十種發起。

復次，善男子！菩薩摩訶薩有十種行。何等為十？

①波羅蜜行，②攝物行，③般若行，④方便行，⑤大悲行，⑥求慧資糧行，  
⑦求智資糧行，⑧清淨信心行，⑨入諸諦行，⑩不分別愛憎境行。

善男子！如是，名為菩薩摩訶薩十種行。

復次，善男子！菩薩摩訶薩有十種無盡觀。何等為十？

①身無盡觀，②事無盡觀，③法無盡觀，④愛無盡觀，⑤見無盡觀，⑥資糧

無盡觀，⑦取無盡觀，⑧無所執著無盡觀，⑨相應無盡觀，⑩道場識白性無盡觀。

善男子！如是，名菩薩摩訶薩十種無盡觀。

復次，善男子！菩薩摩訶薩有十種調伏行。何等為十？

①調伏慳嫉行，捨施如雨故。②調伏破戒行，三業清淨故。

③調伏瞋恚行，修習慈心故。④調伏懈怠行，求法無倦故。

⑤調伏不善行，得禪解脫神通故。⑥調伏無明行，生決定善巧慧資糧故。

⑦調伏諸煩惱行，圓滿一切智資糧故。

⑧調伏顛倒行，出生真實不顛倒資糧道故。

⑨調伏不自在行，於時非時自在故。

⑩調伏著我行，觀察諸法無我故。

善男子！如是，名為菩薩摩訶薩十種調伏行。

復次，善男子！菩薩摩訶薩有十種寂靜地。何等為十？

①身寂靜地，遠離三種身不善業故。②口寂靜地，淨治四種口業故。

③心寂靜地，永捨三種意惡行故。④內寂靜地，不執著自身故。

⑤外寂靜地，不執著一切諸法故。⑥智資糧寂靜地，不執著所行道故。

⑦不自高寂靜地，觀察聖智自性故。

⑧究竟邊際神通寂靜地，出生般若波羅蜜故。

⑨滅戲論寂靜地，不欺誑一切眾生故。

⑩不顧戀身心寂靜地，大悲教化眾生故。

善男子！如是，名為菩薩摩訶薩十種寂靜地。

復次，善男子！諸菩薩摩訶薩，如實行者能得菩提，不如實行則不能得。

如實行者，如其所說，則如是行。不如實行者，但有言說，不能信受、不能修習。

復次，善男子！菩薩摩訶薩，有二種如實行。

何等為二？①道如實行，②斷如實行。

善男子！菩薩摩訶薩，復有二種如實行。

何等為二？①自調伏如實行，②教化眾生如實行。

善男子！菩薩摩訶薩，復有二種如實行。

何等為二？①有功用智如實行，②無功用智如實行。

善男子！菩薩摩訶薩，復有二種如實行。

何等為二？①善建立諸地如實行，②善觀察諸地無差別如實行。

善男子！菩薩摩訶薩，復有二種如實行。

何等為二？①善遠離諸地過失如實行，②善圓滿諸地功德如實行。

善男子！菩薩摩訶薩，復有二種如實行。

何等為二？①善說聲聞辟支佛地如實行，②善說諸佛菩提不退轉法如實行。

善男子！菩薩摩訶薩有如是等無量無邊如實行法。若能如是如實行者，當知是人不久得阿耨多羅三藐三菩提，諸菩薩摩訶薩應勤修學。

爾時，世尊讚文殊師利菩薩言：善哉！善哉！文殊師利！快說此語。

佛說此經已。文殊師利菩薩摩訶薩、勇修智信菩薩摩訶薩、淨月威光天子、

決定光明天子及餘眾會一切世間，天、人、阿修羅等，皆大歡喜，信受奉行。

大乘伽耶山頂經

無上妙法喜見聞 受持讀誦為他說 福智二嚴三障除 出離苦海成正覺

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>